



Broj:  
Sarajevo,

PARLAMENTARNA SKUPŠTINA  
BOSNE I HERCEGOVINE  
PREDSTAVNIČKI DOM  
*n/r Šefik Džaferović, predsjedavajući*

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO: 26.02.20			
Organizaciona jedinica	Klasifikaciona oznaka	Redni broj	Broj priloge
01-02-1-3		15	

**Predmet: Prijedlog zakona o izmjenama i dopunama Zakona o sportu u Bosni i Hercegovini**

Na osnovu čl. 104. i 105. Poslovnika Predstavničkog doma Parlamentarne skupštine BiH ("Službeni glasnik BiH", br. 79/14), kao ovlašteni predlagač, dostavljam **Prijedlog zakona o izmjenama i dopunama Zakona o sportu u Bosni i Hercegovini** radi razmatranja i usvajanja u Parlamentarnoj skupštini BiH.

Predlažem da se Prijedlog zakona razmatra po redovnom zakonodavnom postupku.

U prilogu Vam dostavljam tekst Prijedloga zakona na bosanskom jeziku s obrazloženjem, odredbe koje se mijenjaju odnosno dopunjavaju, nezvanični prečišćeni tekst Zakona o sportu u BiH, te elektronsku verziju Prijedloga zakona.

S poštovanjem,

Poslanik SDP BiH

  
dr. Denis Bećirović

Na osnovu člana IV.4 a) Ustava Bosne i Hercegovine, Parlamentarna skupština Bosne i Hercegovine, na \_\_. sjednici Predstavničkog doma, održanoj \_\_. \_\_. 2015. godine i na \_\_. sjednici Doma naroda, održanoj \_\_. \_\_. 2015. godine, usvojila je

## **ZAKON O IZMJENAMA I DOPUNAMA ZAKONA O SPORTU U BOSNI I HERCEGOVINI**

### **Član 1.**

U Zakonu o sportu Bosne i Hercegovine („Službeni glasnik BiH“, br. 27/08 i 102/09) u članu 2. (Definicija sporta) iza tačke d), briše se interpunkcijski znak tačka, stavlja zarez i dodaje nova tačka e) koja glasi:  
„e) sportsko obrazovanje“.

### **Član 2.**

U članu 9. (Sadržaj strategije) nakon tačke e) briše se interpunkcijski znak tačka, stavlja zarez dodaje nova tačka f) koja glasi:  
„f) ciljevi i zadaće razvoja sporta, aktivnosti potrebne za provedbu tih ciljeva i zadaća, te određuju nosioci razvoja i mjere kontrole njihove realizacije“.

### **Član 3.**

U članu 10. (Validnost Strategije i Programa razvoja) riječi: „pribavljene saglasnosti“ zamjenjuju se riječima: „pribavljena mišljenja“.

U istom članu dodaje se stav (2) koji glasi:

„(2) Vijeće ministara BiH donosi Godišnji program realizacije Strategije i Programa razvoja sporta u Bosni i Hercegovini u kojem se utvrđuju nosioci pripreme i realizacije, rokovi i izvori finansiranja“.

Ispred prvog stava dodaje se oznaka stava: „(1)“.

### **Član 4.**

U članu 22. (Sportski savez), stav (3) briše se.

Stavovi (4) i (5) postaju stavovi (3) i (4).

U dosadašnjem stavu (5) koji je postao stav (4), iza riječi Ministarstva civilnih poslova BiH briše se zarez i riječi: „a do ispunjenja uvjeta iz stava (3) ovog člana“.

### **Član 5.**

U članu 35. (Radni odnos u sportskim organizacijama) u stavu (2) iza riječi: „(“Službeni glasnik BiH“, broj 26/04, 7/05“, briše se veznik: „i“ i stavlja zarez, a iza broja: „48/05“ stavlja se zarez i dodaju brojevi: „60/10 i 32/13)“.

### **Član 6.**

U članu 39. (Prava sportista) dodaje se novi stav (3) koji glasi:

„(3) Sportista kome drugi takmičar pri takmičenju nanese tjelesnu povredu ima pravo na naknadu štete, ako mu je povreda nanesena namjernim ili grubim kršenjem sportskih pravila“.

#### Član 7.

U članu 47. (Obavezna zdravstvena zaštita) u stavu (2) iza riječi: „U sportskim takmičenjima može učestvovati samo lice za koje je“, dodaju se riječi: „u periodu od šest mjeseci prije sportskog takmičenja“.

#### Član 8.

U članu 51. (Sistem, uvjeti i organizacija takmičenja) u stavu (1) riječi: „na nivou Bosne i Hercegovine“ mijenjaju se riječima: „u Bosni i Hercegovini“.

U istom članu stav (2) mijenja se i glasi:

„(2) Organizator je dužan da osigura nesmetano i sigurno održavanje sportskih priredbi i sportskih takmičenja. Organizator je dužan da preduzme mjere koje omogućavaju predupređenje rizika nastanka štete za učesnike, gledaoce i treća lica (upozorenja, isticanja zabrana, davanja obavještenja i uputstava i sl.)“.

Iza stava (2) dodaju se novi stavovi (3), (4), (5) i (6) koji glase:

„(3) Organizator sportskih priredbi i sportskih takmičenja je dužan da, imajući u vidu njen značaj, očekivani broj gledalaca i druge okolnosti, utvrdi da li postoji izražen rizik da za vrijeme njihovog održavanja dođe do nasilja ili nedoličnog ponašanja gledalaca.

(4) Ukoliko postoji opasnost iz stava (3) ovog člana, organizator sportskih priredbi i sportskih takmičenja dužan je da preduzme potrebne sigurnosne mjere u skladu sa zakonom.

(5) Sportske organizacije, sportisti i drugi učesnici sportskog takmičenja dužni su da sarađuju sa organizatorom i ne smiju svojim postupcima izazivati ili doprinositi nasilju ili nedoličnom ponašanju gledalaca.

(6) Sportske organizacije su obavezne da podstiču organizovanje i dobro ponašanje klubova navijača“.

#### Član 9.

U članu 66. (Finansiranje javnog interesa Bosne i Hercegovine) iza stava (1) dodaje se novi stav (2) koji glasi:

„(2) Javne potrebe u sportu na državnom nivou su:

- a) podsticanje i afirmiranje sporta, posebno sporta djece, mladih, studenata i osoba sa invaliditetom,
- b) podsticanje planiranja i izgradnje sportskih objekata,
- c) briga o vrhunskim sportistima,
- d) djelovanje sportskih saveza i Olimpijskog komiteta BiH,
- e) djelovanje informatičkog sistema u sportu,
- f) naučni i razvojni programi u sportu,
- g) međunarodna sportska saradnja i međunarodne obaveze BiH,
- h) dodjeljivanje državne nagrade za sport“.

Ispred prvog stava dodaje se oznaka stava: „(1)“.

#### **Član 10.**

Iza člana 68. (Olakšice za ulagače sredstava za razvoj sporta) dodaje se novi, šesti dio, koji glasi: „DIO ŠESTI A – DRŽAVNA NAGRADA ZA SPORT“, a član 69. (Državna nagrada za sport) mijenja se i glasi:

#### **„Član 69.**

##### **(Državna nagrada za sport)**

- (1) Državna nagrada za sport (u daljnjem tekstu: Državna nagrada) najviše je priznanje koje Bosna i Hercegovina dodjeljuje za posebne rezultate i doprinos od posebnog značaja za razvoj sporta u Bosni i Hercegovini.
- (2) Državna nagrada dodjeljuje se stručnim i javnim radnicima u oblasti sporta, sportistima, pravnim i fizičkim licima koja obavljaju sportsku djelatnost te drugim pravnim i fizičkim licima zaslužnim za razvoj sporta.
- (3) Državna nagrada dodjeljuje se u obliku medalje, posebne diplome i novčane nagrade“.

#### **Član 11.**

Nakon člana 69. (Državna nagrada za sport) dodaju se novi članovi 69a. (Komisija za državnu nagradu za sport) i 69b. (Osiguranje sredstava) koji glase:

#### **„Član 69a.**

##### **(Komisija za državnu nagradu za sport)**

- (1) Državna nagrada dodjeljuje se za višegodišnje uspješno djelovanje u sportu, osvajanje olimpijske medalje, te posebno naučno, stručno, pedagoško ostvarenje ili sportsko dostignuće.
- (2) Odluku o državnoj nagradi donosi Komisija za državnu nagradu za sport (u daljnjem tekstu: Komisija za državnu nagradu).
- (3) Komisija za državnu nagradu ima predsjednika i pet članova, koje bira Parlamentarna skupština BiH iz reda uglednih sportskih i javnih radnika, istaknutnih sportista i drugih istaknutnih stručnjaka iz oblasti sporta na period od četiri godine, na prijedlog Vijeća ministara BiH.
- (4) Državna nagrada dodjeljuje se kao godišnja nagrada i nagrada za životno djelo.
- (5) Nagrade iz stava (4) ovog člana, licima iz člana 69. stav (2), mogu se dodijeliti samo jednom.
- (6) Vijeće ministara BiH donosi pravilnik kojim bliže uređuje kriterije za dodjelu državne nagrade, način rada Komisije za državnu nagradu i druga pitanja značajna za dodjelu državne nagrade.

#### **Član 69b.**

##### **(Osiguranje sredstava)**

- (1) Dodjela državne nagrade od državnog je interesa, a sredstva za dodjelu nagrade osiguravaju se u Budžetu institucija Bosne i Hercegovine.
- (2) Visinu novčanog dijela godišnje nagrade i nagrade za životno djelo odlukom će odrediti Vijeće ministara BiH“.

**Član 12.**

U članu 70. dodaje se naziv člana, koji glasi: „**(Nadzor nad sprovođenjem Zakona)**“.

**Član 13.**

U članu 71. dodaje se naziv člana, koji glasi: „**(Kaznene odredbe)**“.

U stavu (1) iza tačke g) briše se interpunkcijski znak tačka, stavlja zarez i dodaje tačka h) koja glasi:

„h) ako organizira sportsko takmičenje i sportsku priredbu u BiH, a ne ispunjava uslove iz člana 51. ovog Zakona“.

**Član 14.**

Ovaj zakon stupa na snagu osam dana od dana objave u "Službenom glasniku BiH".

**Predsjedavajući**  
Predstavničkog doma  
Parlamentarne skupštine BiH

---

**Predsjedavajući**  
Doma naroda  
Parlamentarne skupštine BiH

---



## O B R A Z L O Ž E N J E

### I. USTAVNI OSNOV ZA USVAJANJE ZAKONA

Ustavni osnov za donošenje Zakona o izmjenama i dopunama zakona o sportu u Bosni i Hercegovini sadržan je u odredbama člana IV.4 a) Ustava Bosne i Hercegovine prema kojem je Parlamentarna skupština Bosne i Hercegovine nadležna za „*donošenje zakona koji su potrebni za provođenje odluka Predsjedništva ili za vršenje funkcija Skupštine Bosne i Hercegovine po ovom Ustavu*“.

### II. RAZLOZI ZA DONOŠENJE ZAKONA

Razlog za donošenje ovog Zakona je preciznije definiranje ili tehnička popravka već postojećih odredaba Zakona o sportu u BiH.

### III. OBRAZLOŽENJE POJEDINIH RJEŠENJA I PRINCIPI NA KOJIMA JE PRIJEDLOG ZAKONA ZASNOVAN

U članu 1. Prijedloga zakona precizira se definicija sporta, tako što se dodaje i sportsko obrazovanje, koje treba da omogući obučavanje u fizičkom vježbanju, razvoj fizičkih sposobnosti i sticanje sportskih navika.

U članu 2. precizira se sadržaj Strategije razvoja sporta u BiH, koja obavezno treba da sadrži zadatke i ciljeve razvoja sporta.

Članom 3. predlaže se donošenje godišnjeg programa realizacije Strategije i program razvoja sporta, kako bi se na taj način utvrdili nosioci aktivnosti, rokovi izvršenja i izvori finansiranja.

U članu 4. predlaže se brisanje stava (3) u članu 22. kojim se definira organizaciona struktura sportskog saveza, koja polazi od klubova, koji se shodno izraženom interesu i slobodnoj volji udružuju u strukovne saveze BiH, entitetske ili u zavisnosti od razvijenosti sporta i druge organizacione cjeline. S obzirom da je praksa evropskih zemalja da je klub osnovna organizaciona jedinica koja mora imati pravo slobodnog udruživanja u sve više nivoe, stav (3) u cijelosti odudara od takvih principa, te je samim tim nepotreban.

Članom 5. dopunjava se pozivanje na broj Službenog glasnika BiH gdje je objavljen Zakon o radu u institucijama Bosne i Hercegovine.

U članu 6. predlaže se osiguranje prava na naknadu štete sportistima koji zadobiju tjelesnu povredu namjernim ili grubim kršenjem sportskih pravila, što je jedno od osnovnih prava sportista zagarantovano u većini razvijenih evropskih zemalja.

U članu 7. predlaže se preciziranje perioda utvrđivanja opće zdravstvene sposobnosti lica koje želi učestvovati na sportskom takmičenju.

U članu 8. predlaže se da se utvrde obaveze organizatora i uslovi koje organizator sportskog takmičenja mora ispuniti prije održavanja sportskog takmičenja ili priredbe.

Članom 9. propisuje se definiranje javnih potreba BiH u oblasti sporta.

Članovima 10. i 11. predlaže se ustanovljenje državne nagrade za sport, koja se dodjeljuje za izuzetna sportska dostignuća i doprinos od posebnog značaja za razvoj sporta u Bosni i Hercegovini. Zakonsko uvođenje državne nagrade za sport predstavlja svojevrsno priznanje ali i dodatnu motivaciju za sve one koji u budućnosti budu uspješno djelovali u sportu, osvajali olimpijske medalje i ostvarivali naučna, stručna i pedagoška dostignuća u oblasti sporta. Predlaže se da Vijeće ministara BiH posebnim aktom utvrdi uslove za dodjelu nagrade, način rada Komisije za državnu nagradu i druga pitanja značajna za dodjelu nagrade.

Članom 12. vrši se popravka greške u tekstu Zakona o sportu u BiH i usklađuje sa odredbama člana 29. stav (3) Jedinistvenih pravila za izradu pravnih propisa u institucijama BiH.

Članom 13. pored popravke greške odnosno dodavanja naziva članu, predlaže se kažnjavanje organizatora sportskih takmičenja i priredbi u BiH, koji ne organiziraju sportska takmičenja u skladu sa Evropskom konvencijom o suzbijanju nasilja, nedoličnog ponašanja gledalaca na sportskim priredbama, posebno na fudbalskim utakmicama.

Član 14. sadrži odredbu o stupanju na snagu Zakona.

Principi na kojima je ovaj prijedlog Zakona zasnovan, a koji su se poštivali i prilikom donošenja Zakona o sportu u BiH 2008. godine, su zaštita ljudskih prava i osnovnih sloboda i poštivanje principa karakterističnih za sport, poput: afirmacije duha olimpizma, pravo svih da se bave sportom, autonomnost sportskih organizacija, efikasan sistem školovanja i stručnog osposobljavanja i usavršavanja stručnih kadrova u sportu, zdravstvene zaštite sportista, princip ostvarivanja javnog interesa s ciljem postizanja vrhunskih sportskih rezultata u oblasti sporta.

#### **IV. PROCJENA FINANSIJSKIH SREDSTAVA NEOPHODNIH ZA PROVOĐENJE ZAKONA**

Za provođenje ovog Zakona potrebna su određena finansijska sredstva i to za dodjelu novčanog dijela državne nagrade za sport. Ali, obzirom da se radi o izmjenama i dopunama Zakona o sportu u BiH kojim je već predviđeno postojanje državne nagrade za sport, finansijska sredstva za provođenje ovog zakona su već osigurana u Budžetu institucija BiH.

## **ODREDBE ZAKONA O SPORTU U BIH KOJE SE MIJENJAJU, ODNOSNO DOPUNJAVAJU**

\*\*\*

### **Član 2.**

#### **(Definicija sporta)**

Sport u smislu ovog Zakona obuhvata:

- a) sportske aktivnosti i igre organizirane radi postizanja sportskih dostignuća koja se ostvaruju shodno utvrđenim pravilima (sportska takmičenja i sportske priredbe),
- b) sportske aktivnosti i igre organizirane s ciljem unapređenja zdravlja ili rekreacije (sportska rekreacija, sport za sve),
- c) sportske aktivnosti organizirane za invalidna lica,
- d) organizirani školski i univerzitetski sport.

\*\*\*

### **Član 9.**

#### **(Sadržaj Strategije)**

Strategijom se utvrđuju:

- a) osnovna polazišta i pravci razvoja,
- b) sadržaj i obim sportskih djelatnosti koji se finansiraju, odnosno sufinansiraju iz budžeta Bosne i Hercegovine,
- c) razvojni i stručni zadaci u sportu,
- d) okvirni kriteriji za vrednovanje programa i njihovog finansiranja u sportu,
- e) nosioci razvoja i mjere kontrole njegove realizacije.

\*\*\*

### **Član 10.**

#### **(Validnost Strategije i Programa razvoja)**

Strategiju i Program razvoja sporta u Bosni i Hercegovini usvaja Parlamentarna skupština BiH na predlog Vijeća ministara BiH, uz prethodno pribavljene saglasnosti entiteta i Brčko Distrikta Bosne i Hercegovine.

\*\*\*

### **Član 22.**

#### **(Sportski savez)**

- (1) Sportski klubovi u pojedinim sportovima udružuju se u sportske saveze da bi ostvarili zajedničke interese i ciljeve.
- (2) Sportski savezi se organiziraju na nivou Bosne i Hercegovine i entiteta, a u zavisnosti od razvijenosti sporta i na drugim nivoima administrativnog organiziranja u Bosni i Hercegovini. Za jedan sport na nivou Bosne i Hercegovine može da se osnuje samo jedan sportski savez.
- (3) Sportski savez Bosne i Hercegovine osniva se u skladu sa ovim Zakonom i Zakonom o udruženjima i fondacijama Bosne i Hercegovine, na osnovu odluka entitetskih sportskih saveza o dobrovoljnom udruživanju, a u slučaju spora između entitetskih sportskih saveza, odluku o tome donosi Vijeće ministara BiH.



- (4) Sjedište sportskih saveza Bosne i Hercegovine određuje se na osnovu razvijenosti pojedinog sporta, tradicije, masovnosti i kvaliteta određene sportske grane.
- (5) Ukoliko zbog nerazvijenosti sporta ne postoji organiziran sportski savez na nivou jednog entiteta, registriranje saveza na nivou Bosne i Hercegovine za taj sport izvršiće se uz saglasnost Ministarstva civilnih poslova BiH, a do ispunjenja uvjeta iz stava (3) ovog člana.

\*\*\*

#### Član 35.

##### **(Radni odnos u sportskim organizacijama)**

- (1) Pravna lica mogu zasnovati radni odnos sa sportistima, stručnim radnicima, stručnim i administrativnim osobljem.
- (2) Radni odnos u sportskim organizacijama, kao pravnim licima registriranim na nivou Bosne i Hercegovine, uređuje se ugovorom o radu u skladu sa Zakonom o radu u institucijama Bosne i Hercegovine ("Službeni glasnik BiH", broj 26/04, 7/05 i 48/05).
- (3) Zaposleni ima sva prava i obaveze iz radnog odnosa koji su utvrđeni Zakonom iz stava (2) ovog člana, kolektivnim ugovorom i ovim Zakonom.
- (4) Radni odnos kod sportskih udruženja kao pravnih lica na entitetskom i drugim nivoima administrativnog organiziranja uređuje se ugovorom o radu, u skladu sa odgovarajućim propisima na tom nivou.

\*\*\*

#### Član 39.

##### **(Prava sportista)**

- (1) Sportista je obavezan da se pridržava općih i posebnih pravila koji su propisani ovim Zakonom, entitetskim zakonima o sportu, pravilima svojih organizacija i pravilima međunarodnih sportskih asocijacija.
- (2) Osim prava iz člana 37. ovog Zakona, sportista ima pravo da:
- a) bude zaštićen od svake vrste duhovnog i fizičkog nasilja, ugrožavanja slobode ljudskog i sportskog integriteta, zdravlja i sportskog dostojanstva,
  - b) koristi sportske objekte i opremu, usluge stručnog rada i zdravstvene zaštite u skladu sa propisima koji to reguliraju,
  - c) na osnovu slobodno izražene volje učestvuje u reprezentativnim selekcijama.

\*\*\*

#### Član 47.

##### **(Obavezna zdravstvena zaštita)**

- (1) Zdravstvena zaštita je obavezna za sve učesnike u sportu.
- (2) U sportskim takmičenjima može učestvovati samo lice za koje je u utvrđena opća i posebna zdravstvena sposobnost, koju utvrđuje ovlašćeni ljekar specijalista sportske medicine.

\*\*\*

Član 51.

**(Sistem, uvjeti i organizacija takmičenja)**

(1) Sistem, uvjete i organizaciju sportskih takmičenja na nivou Bosne i Hercegovine utvrđuju sportski savezi Bosne i Hercegovine u skladu s odredbama ovog Zakona i pravilima međunarodnih sportskih asocijacija.

(2) Sistem, uvjete i organizaciju sportskih takmičenja na entitetskom nivou utvrđuje entitetski sportski savez.

\*\*\*

Član 66.

**(Finansiranje javnog interesa Bosne i Hercegovine)**

Javni interes u sportu u Bosni i Hercegovini ostvaruje se sufinansiranjem iz sredstava budžeta institucija Bosne i Hercegovine na osnovu Strategije, dugoročnih i godišnjih programa razvoja sporta u Bosni i Hercegovini.

\*\*\*

Član 68.

**(Olakšice za ulagače sredstava za razvoj sporta)**

Zakonima Bosne i Hercegovine iz oblasti poreske politike, pravnim i fizičkim licima koja ulažu sredstva u razvoj sporta, uložena sredstva priznaju se kao troškovi i oslobođeni su poreza.

Član 69.

**(Državna nagrada za sport)**

Za izuzetan doprinos u razvoju sporta i afirmaciju Bosne i Hercegovine biće utvrđena državna nagrada za sport. Vijeće ministara BiH će, na predlog Ministarstva civilnih poslova BiH, donijeti odluku o ustanovljenju državne nagrade za sport, kao i kriterijume za njenu dodjelu.

\*\*\*

Član 70.

(1) Nadzor nad sprovođenjem ovog Zakona i propisa koji su doneseni na osnovu ovog Zakona na nivou Bosne i Hercegovine vrši Ministarstvo civilnih poslova BiH.

(2) Pitanje upravnog i stručnog nadzora na entitetskom i drugim nivoima administrativnog organiziranja vršiće entitetska ministarstva zadužena za sport, a na osnovu posebnih zakonskih i podzakonskih akata.

\*\*\*

Član 71.

(1) Novčanom kaznom u iznosu od 5.000,00 KM do 10.000,00 KM kaznit će se za prekršaj pravno lice ako:

a) obavlja sportsku djelatnost a nije registrirano u skladu sa članom 14. ovog Zakona i upisano u poslovni registar iz člana 15. ovog Zakona,

b) obavljanje stručnih poslova u sportu povjeri licima koja za to ne ispunjavaju uvjete iz čl. 44, 45. i 46. ovog Zakona,

- c) omogućiti da na sportskom takmičenju učestvuje lice za koje nije utvrđena opća ili posebna zdravstvena sposobnost,
- d) organizira sportsko takmičenje i sportsku priredbu u Bosni i Hercegovini a ne ispunjava uvjete iz člana 52. ovog Zakona,
- e) organizira međunarodno sportsko takmičenje ili sportsku priredbu bez saglasnosti organa iz člana 54. ovog Zakona,
- f) ne zasnjuje radni odnos sa sportistom, stručnim radnikom, stručnim i administrativnim zaposlenikom u skladu sa članom 35. ovog Zakona,
- g) organu uprave ne dostavi u propisanom roku tražene podatke ili akte u vezi sa postupanjem u upravnom postupku i vršenju upravnog nadzora.

(2) Novčanom kaznom u iznosu od 1.000,00 KM do 5.000,00 KM kaznit će se za prekršaj fizičko lice ako:

- a) se ne pridržava odredaba iz člana 40. ovog Zakona,
- b) se bavi stručnim radom u oblasti sporta a ne ispunjava uvjete iz čl. 44, 45. i 46. ovog Zakona,
- c) ne posjeduje dozvolu za rad iz člana 42. ovog Zakona.

(3) U slučaju ponovnog prekršaja, prekršilac će se kazniti maksimalnom novčanom kaznom iz st. (1) i (2) ovog člana.

**ZAKON**  
**O SPORTU U BOSNI I HERCEGOVINI<sup>1</sup>**  
**(Nezvanični prečišćeni tekst)**

**DIO PRVI- OPĆE ODREDBE**

Član 1.

**(Predmet Zakona)**

Ovim Zakonom uređuje se sport u Bosni i Hercegovini, javni interes i ciljevi, nadležnosti Bosne i Hercegovine, Republike Srpske i Federacije Bosne i Hercegovine (u daljnjem tekstu: entiteti), te Brčko Distrikta Bosne i Hercegovine i drugih nivoa administrativnog organiziranja; osnovni principi u organiziranju sporta; prava i obaveze sportista; domaća i međunarodna sportska takmičenja drugih nivoa administrativnog organiziranja u Bosni i Hercegovini; priredbe, izgradnja, održavanje i korišćenje sportskih objekata; ostvarivanje međunarodne saradnje; organiziranje i rad ustanova u oblasti sporta; sportske aktivnosti invalidnih lica; nagrade i priznanja sportistima i sportskim organizacijama; zdravstvena zaštita sportista; sprečavanje i suzbijanje svih oblika nasilja i nedoličnog ponašanja gledalaca; korišćenje nedozvoljenih stimulativnih sredstava u sportu; stručni rad; naučnoistraživački rad i informatika u sportu; finansiranje sportskih aktivnosti, nadzor i kaznene odredbe.

Član 2.

**(Definicija sporta)**

Sport u smislu ovog Zakona obuhvata:

- a) sportske aktivnosti i igre organizirane radi postizanja sportskih dostignuća koja se ostvaruju shodno utvrđenim pravilima (sportska takmičenja i sportske priredbe),
- b) sportske aktivnosti i igre organizirane s ciljem unapređenja zdravlja ili rekreacije (sportska rekreacija, sport za sve),
- c) sportske aktivnosti organizirane za invalidna lica,
- d) organizirani školski i univerzitetski sport,
- e) sportsko obrazovanje.

---

<sup>1</sup> Ovaj nezvanični prečišćeni tekst **sadrži**: Zakon o sportu u Bosni i Hercegovini ("Službeni glasnik BiH" broj 27/08); **Zakon o izmjenama i dopunama zakona o sportu u Bosni i Hercegovini** ("Službeni glasnik BiH" broj 102/09) označeno **podebljanim slovima**.

U prečišćenom tekstu označene su i izmjene i dopune Zakon o sportu u BiH koje se predlažu Prijedlogom zakona o izmjenama i dopunama zakona o sportu u BiH, predlagača Denisa Bećirovića - označeno podvučenim slovima.

Ovaj nezvanični prečišćeni tekst koristi se samo za internu upotrebu i na njega se ne može pozivati prilikom službene upotrebe.

### Član 3.

#### **(Javni interes)**

Sport u Bosni i Hercegovini je djelatnost od javnog interesa.

### Član 4.

#### **(Međunarodna zasnovanost)**

Sport u Bosni i Hercegovini zasniva se na principima i standardima koji su utvrđeni u Evropskoj povelji o sportu, Evropskoj konvenciji o zaštiti ljudskih prava i osnovnih sloboda, Konvenciji UN-a o pravima djeteta, Međunarodnoj konvenciji protiv dopinga u sportu, Evropskoj konvenciji o nasilju i nedoličnom ponašanju gledalaca na sportskim priredbama, Olimpijskoj povelji, Paraolimpijskoj povelji, pravilima međunarodnih sportskih asocijacija, Evropskom kodeksu o sportskoj etici, Deklaraciji o sportu, toleranciji i fer-pleju, te Izjavi iz Lozane o organiziranju sporta u Bosni i Hercegovini.

### Član 5.

#### **(Decentralizacija)**

(1) Sport u Bosni i Hercegovini organizira se na decentraliziran način sa utvrđenim pravima i nadležnostima Bosne i Hercegovine, entiteta, Brčko Distrikta Bosne i Hercegovine i drugih nivoa administrativnog organiziranja.

(2) U skladu sa ustavima entiteta i drugim nivoima administrativnog organiziranja, te njihovim Zakonima o sportu, reguliraju se i pitanja iz oblasti sporta koja nisu regulirana ovim Zakonom.

## POGLAVLJE I- OSNOVNI PRINCIPI U SPORTU

### Član 6.

#### **(Osnovni principi organizacije sporta)**

Osnovni principi na kojim se organizira sport u Bosni i Hercegovini su:

- a) prava i slobode sportista,
- b) afirmacija duha olimpizma,
- c) pravo svih građana da se bave sportom pod istim uvjetima bez obzira na nacionalnu, vjersku, političku, rasnu, socijalnu i spolnu pripadnost,
- d) ostvarivanje javnog interesa države u ovoj oblasti i obaveza državnih organa da zakonima i na drugi način, materijalnom podrškom i programima razvoja stvaraju opće i posebne uvjete za sportske aktivnosti, sportsko napredovanje i usavršavanje, materijalnu i društvenu stimulaciju za ostvarivanje vrhunskih sportskih rezultata,
- e) organiziranje efikasnog sistema stručnog osposobljavanja i usavršavanja stručnih kadrova u sportu,
- f) osiguranje zdravstvene zaštite sportista i sprečavanje upotrebe nedozvoljenih stimulativnih sredstava,
- g) stručnost u radu i podsticanje naučnoistraživačkog rada, primjenu savremenih metoda rada, informatike i izdavačke djelatnosti,
- h) pravilo da se svi sporovi između sportista, sportskih organizacija i organa rješavaju isključivo preko i unutar odgovarajućih sportskih organa i arbitražnih sportskih tijela,



i) autonomnost sportskih organizacija u pogledu uređivanja unutrašnjih odnosa i udruživanja.

## POGLAVLJE II- JAVNI INTERES I CILJEVI BOSNE I HERCEGOVINE U SPORTU

### Član 7.

#### (Javni interes i ciljevi)

Javni interes i ciljevi Bosne i Hercegovine u sportu su:

- a) razvijanje svijesti građana, posebno mladih i **invalidnih lica** o sportu i njegovim vrijednostima,
- b) doprinos vaspitanju, obrazovanju i razvoju djece i omladine,
- c) podsticanje i afirmiranje sporta i njegovih vrijednosti kao dijela kulture i ukupnih materijalnih i duhovnih vrijednosti društva,
- d) očuvanje zdravlja kao osnove svake ljudske aktivnosti, radne produktivnosti, izražavanje stvaralaštva i humanog življenja,
- e) podsticanje sistematskog i organiziranog bavljenja sportom u slobodnom vremenu,
- f) prezentacija vrhunskog sportskog stvaralaštva na svim nivoima,
- g) sistemsko stvaranje uvjeta za ostvarivanje vrhunskih sportskih rezultata,
- h) organizacija sistema takmičenja u skladu sa pravilima međunarodnih sportskih federacija.

### Član 8.

#### (Utvrdjivanje Strategije razvoja sporta i programa razvoja)

- (1) Da bi se ostvario javni interes i ciljevi u sportu u Bosni i Hercegovini, utvrđuje se Strategija razvoja sporta u Bosni i Hercegovini (u daljnjem tekstu: Strategija).
- (2) Strategija se donosi za najmanje četiri godine (olimpijski ciklus).
- (3) Na osnovu Strategije donose se programi razvoja sporta.

### Član 9.

#### (Sadržaj Strategije)

Strategijom se utvrđuju:

- a) osnovna polazišta i pravci razvoja,
- b) sadržaj i obim sportskih djelatnosti koji se finansiraju, odnosno sufinansiraju iz budžeta Bosne i Hercegovine,
- c) razvojni i stručni zadaci u sportu,
- d) okvirni kriteriji za vrednovanje programa i njihovog finansiranja u sportu,
- e) nosioci razvoja i mjere kontrole njegove realizacije,
- f) ciljevi i zadaće razvoja sporta, aktivnosti potrebne za provedbu tih ciljeva i zadaća, te određuju nosioci razvoja i mjere kontrole njihove realizacije.

### Član 10.

#### (Validnost Strategije i Programa razvoja)

- (1) Strategiju i Program razvoja sporta u Bosni i Hercegovini usvaja Parlamentarna skupština BiH na prijedlog Vijeća ministara BiH, uz prethodno pribavljena mišljenja entiteta i Brčko Distrikta Bosne i Hercegovine.

(2) Vijeće ministara BiH donosi Godišnji program realizacije Strategije i Programa razvoja sporta u Bosni i Hercegovini u kojem se utvrđuju nosioci pripreme i realizacije, rokovi i izvori finansiranja.

#### Član 11.

##### **(Strategije i programi razvoja na nižim nivoima vlasti)**

U skladu sa Strategijom, ovim Zakonom i drugim zakonskim propisima entiteti i drugi nivoi administrativnog organiziranja donose svoje strategije i programe razvoja sporta.

#### Član 12.

##### **(Nadležnosti Vijeća za sport Bosne i Hercegovine)**

(1) Vijeće za sport Bosne i Hercegovine (u daljnjem tekstu: Vijeće) najviše je savjetodavno tijelo Ministarstva civilnih poslova BiH koje se brine za razvoj i kvalitet sporta na nivou Bosne i Hercegovine.

(2) Vijeće je nadležno da:

- a) daje mišljenja o Strategiji,
- b) daje mišljenja o Programu razvoja sporta,
- c) daje mišljenja o godišnjim planovima i finansijskim potrebama sporta,
- d) raspravlja o pitanjima značajnim za sport te predlaže i podstiče donošenje mjera za unapređenje sporta,
- e) predlaže prioritetne projekte, elaborate i studije za njihovo finansiranje u sistemu javnih potreba u sportu,
- f) predlaže smjernice za izradu propisa o kategorizaciji sportista,
- g) daje mišljenja i preporuke za nacрте i predloge propisa koji se odnose na sport,
- h) obavlja i druge poslove utvrđene ovim Zakonom i drugim propisima.

#### Član 13.

##### **(Imenovanje i sastav Vijeća)**

(1) Vijeće ima ukupno 17 članova koje imenuje Vijeće ministara BiH, na prijedlog ministra civilnih poslova BiH, i to: predsjednika, dva potpredsjednika i 14 članova, a koji se biraju između istaknutih sportista i sportskih radnika.

(2) Članove Vijeća predlažu: Ministarstvo civilnih poslova BiH sedam članova, **Olimpijski komitet BiH i Paraolimpijski komitet BiH tri člana (od toga Olimpijski komitet BiH dva, a Paraolimpijski komitet BiH jednog člana)**, po tri člana entiteti u konsultaciji sa entitetskim i kantonalnim ministarstvima nadležnim za sport, i Brčko Distrikt Bosne i Hercegovine jednog člana.

(3) Vijeće se imenuje na period od četiri godine (olimpijski ciklus).

(4) Za svoj rad Vijeće je odgovoran Vijeću ministara BiH, kojem najmanje dva puta godišnje podnosi izvještaj o svom radu.

(5) Vijeće jednom godišnje podnosi izvještaj o svom radu Parlamentarnoj skupštini BiH.

(6) Administrativne poslove za Vijeće obavlja Ministarstvo civilnih poslova BiH.

(7) Vijeće donosi poslovnik o svom radu, na koji saglasnost daje ministar civilnih poslova BiH.

## DIO DRUGI- ORGANIZIRANJE SPORTA

### Član 14.

#### **(Nosioći sportskih aktivnosti)**

Nosioći sportskih aktivnosti u Bosni i Hercegovini su pravna i fizička lica registrirana da obavljaju sportske aktivnosti u skladu sa ovim Zakonom, Zakonom o udruženjima i fondacijama Bosne i Hercegovine, entitetskim zakonima o udruženjima i fondacijama, entitetskim zakonima o sportu, zakonima o preduzećima entiteta i drugih nivoa administrativnog organiziranja u Bosni i Hercegovini.

### Član 15.

#### **(Upis u registar)**

(1) Pravna i fizička lica u oblasti sporta upisuju se u posebne registre u skladu sa ovim Zakonom, zakonima entiteta i drugih nivoa administrativnog organiziranja u Bosni i Hercegovini.

(2) Pravilnik o vođenju registra pravnih i fizičkih lica u oblasti sporta na nivou Bosne i Hercegovine donosi ministar civilnih poslova BiH.

## POGLAVLJE I- PRAVNA LICA (SPORTSKA UDRUŽENJA)

### Član 16.

#### **(Pravna lica)**

Pravna lica u oblasti sporta u smislu ovog Zakona su:

- a) sportski klub (amaterski i profesionalni),
- b) sportsko društvo,
- c) sportski savez u određenom sportu,
- d) sportski klub invalidnih lica (**amaterski i profesionalni**),
- e) **sportsko društvo invalidnih lica,**
- f) sportski savez invalidnih lica **u određenom sportu,**
- g) Olimpijski komitet Bosne i Hercegovine,
- h) Paraolimpijski komitet Bosne i Hercegovine,
- i) ustanove i institucije u oblasti sporta.

### Član 17.

#### **(Sportski klub)**

(1) Osnovni oblik organiziranja u sportu je sportski klub.

(2) Klub može obavljati sportsku aktivnost amaterski i profesionalno.

### Član 18.

#### **(Amaterski sportski klub)**

Amaterski sportski klub je dobrovoljna nevladina neprofitna organizacija koja se organizira kao udruženje građana za obavljanje sportske djelatnosti u skladu sa Zakonom o udruženjima i fondacijama Bosne i Hercegovine, entitetskim zakonima o udruženjima i fondacijama, ovim

Zakonom, entitetskim zakonima o sportu i propisima iz oblasti sporta na odgovarajućem nivou administrativnog organiziranja.

#### Član 19.

##### **(Način osnivanja amaterskog sportskog kluba)**

- (1) Amaterski sportski klub osniva se osnivačkim aktom.
- (2) Amaterski sportski klub mogu da osnuju domaća pravna i fizička lica.
- (3) Amaterski sportski klub iz stava (1) ovog člana mogu da osnuju najmanje tri fizička lica ili pravno lice.

#### Član 20.

##### **(Profesionalni sportski klub)**

- (1) Profesionalni sportski klub osniva se kao privredno društvo, odnosno preduzeće s ciljem obavljanja sportske djelatnosti.
- (2) Profesionalni sportski klub osniva se i registrira kao poslovni subjekat kod nadležnog suda u skladu sa Okvirnim zakonom o registraciji poslovnih subjekata u Bosni i Hercegovini ("Službeni glasnik BiH", broj 42/04) i odgovarajućim entitetskim zakonima kojima se uređuje osnivanje poslovnih subjekata, ovim Zakonom i zakonima o sportu entiteta i drugih nivoa administrativnog organiziranja, kao i statutima sportskih saveza.

#### Član 21.

##### **(Sportsko društvo)**

- (1) Sportski klubovi mogu se udruživati u sportska društva radi uređivanja i ostvarivanja zajedničkih ciljeva i interesa, kao i zajedničkog nastupanja u oblasti sporta.
- (2) Međusobne odnose i prava sportski klubovi udruženi u sportsko društvo reguliraju osnivačkim aktom i drugim aktima sportskog društva.
- (3) Sportsko društvo je nosilac prava na zajednički naziv i zajedničke simbole, ako osnivačkim i drugim aktima nije drugačije određeno.
- (4) Na osnivanje, upis u registar, obavljanje sportskih aktivnosti i sportskih djelatnosti, rješavanje sporova, odgovornost, kao i na druga pitanja u vezi sa radom sportskih društava, shodno se primjenjuju odredbe ovog Zakona koje se odnose na sportska udruženja, ako ovim Zakonom nije drugačije određeno.

#### Član 22.

##### **(Sportski savez)**

- (1) Sportski klubovi u pojedinim sportovima udružuju se u sportske saveze da bi ostvarili zajedničke interese i ciljeve.
- (2) Sportski savezi se organiziraju na nivou Bosne i Hercegovine i entiteta, a u zavisnosti od razvijenosti sporta i na drugim nivoima administrativnog organiziranja u Bosni i Hercegovini. Za jedan sport na nivou Bosne i Hercegovine može da se osnuje samo jedan sportski savez.
- ~~(3) Sportski savez Bosne i Hercegovine osniva se u skladu sa ovim Zakonom i Zakonom o udruženjima i fondacijama Bosne i Hercegovine, na osnovu odluka entitetskih sportskih saveza o dobrovoljnom udruživanju, a u slučaju spora između entitetskih sportskih saveza, odluku o tome donosi Vijeće ministara BiH.~~



(3) Sjedište sportskih saveza Bosne i Hercegovine određuje se na osnovu razvijenosti pojedinog sporta, tradicije, masovnosti i kvaliteta određene sportske grane.

(4) Ukoliko zbog nerazvijenosti sporta ne postoji organiziran sportski savez na nivou jednog entiteta, registriranje saveza na nivou Bosne i Hercegovine za taj sport izvršiće se uz saglasnost Ministarstva civilnih poslova BiH, ~~a do ispunjenja uvjeta iz stava (3) ovog člana.~~

#### Član 23.

##### **(Nadležnost sportskih saveza Bosne i Hercegovine)**

Sportski savezi Bosne i Hercegovine nadležni su za:

- a) organiziranje i sprovođenje sistema takmičenja,
- b) zastupanje i predstavljanje sporta u međunarodnim sportskim organizacijama,
- c) pripremanje i nastupanje državnih reprezentacija na zvaničnim međunarodnim takmičenjima,
- d) utvrđivanje programa razvoja u skladu sa Strategijom,
- e) saradnju sa nadležnim sportskim i drugim organima Bosne i Hercegovine.

#### Član 24.

##### **(Olimpijski komitet Bosne i Hercegovine)**

Olimpijski komitet Bosne i Hercegovine je nevladino sportsko udruženje koje obavlja aktivnosti u skladu sa odredbama Olimpijske povelje, Etičkog kodeksa MOK-a, Antidoping kodeksa olimpijskog pokreta, Zajedničke izjave iz Lozane, Zakona o udruženjima i fondacijama Bosne i Hercegovine i ovim Zakonom.

#### Član 25.

##### **(Osnivači Olimpijskog komiteta Bosne i Hercegovine)**

Olimpijski komitet Bosne i Hercegovine osnivaju sportski savezi olimpijskih sportova Bosne i Hercegovine, vrhunski sportisti, stručnjaci i sportski radnici a u skladu sa odredbama Olimpijske povelje.

#### Član 26.

##### **(Akti Olimpijskog komiteta Bosne i Hercegovine)**

Ciljevi i djelokrug rada, članstvo, sastav, organi i tijela Olimpijskog komiteta Bosne i Hercegovine utvrđuju se osnivačkim aktom, statutom i drugim aktima Olimpijskog komiteta uz ravnopravnu zastupljenost iz konstitutivnih naroda.

#### Član 27.

##### **(Program aktivnosti Olimpijskog komiteta Bosne i Hercegovine)**

Olimpijski komitet Bosne i Hercegovine, u skladu sa Statutom i propisima Međunarodnog olimpijskog komiteta, donosi svoj program aktivnosti kojima se utvrđuje:

- a) širenje i afirmiranje principa olimpijskog pokreta i etičkih normi u sportu,
- b) briga i zaštita simbola i obilježja Međunarodnog olimpijskog komiteta u Bosni i Hercegovini,
- c) predstavljanje sporta Bosne i Hercegovine u Međunarodnom olimpijskom komitetu i odgovarajućim međunarodnim sportskim asocijacijama,



- d) organizacija i rukovođenje aktivnosti nastupa sportista Bosne i Hercegovine na olimpijskim igrama i drugim zvaničnim međunarodnim takmičenjima,
- e) učešće ekipa i pojedinaca na drugim međunarodnim takmičenjima pod okriljem MOK-a,
- f) podsticanje, praćenje i unapređenje sporta u Bosni i Hercegovini,
- g) učestvovanje u ostvarivanju politike razvoja sporta u Bosni i Hercegovini,
- h) predlaganje programa od javnog interesa u sportu,
- i) učešće u izradi Strategije,
- j) usklađivanje aktivnosti sportskih saveza Bosne i Hercegovine na ostvarivanju Strategije, i
- k) druga pitanja od značaja za razvoj i unapređenje olimpijskih sportova u Bosni i Hercegovini.

#### **Član 28.**

##### **(Sportski klub invalidnih lica)**

- (1) Radi organiziranja sportsko - rekreativne aktivnosti i sportskih takmičenja invalidnih lica, osnivaju se sportski klubovi invalidnih lica.**
- (2) Sportski klub invalidnih lica može obavljati sportsku aktivnost amaterski i profesionalno.**

#### **Član 28a.**

##### **(Amaterski sportski klub invalidnih lica)**

**Amaterski sportski klub invalidnih lica je dobrovoljna nevladina neprofitna organizacija koja se organizira kao udruženje građana za obavljanje sportske djelatnosti u skladu sa Zakonom o udruženjima i fondacijama Bosne i Hercegovine, zakonima o udruženjima i fondacijama entiteta, ovim zakonom, zakonima o sportu Republike Srpske, kantona, Brčko Distrikta Bosne i Hercegovine i drugim propisima iz oblasti sporta.**

#### **Član 28b.**

##### **(Profesionalni sportski klub invalidnih lica)**

- (1) Profesionalni sportski klub invalidnih lica osniva se kao privredno društvo, odnosno preduzeće s ciljem obavljanja sportske djelatnosti.**
- (2) Profesionalni sportski klub invalidnih lica osniva se i registrira kao poslovni subjekat kod nadležnog suda u skladu s Okvirnim zakonom o registraciji poslovnih subjekata u Bosni i Hercegovini i odgovarajućim entitetskim zakonima kojima se uređuje osnivanje poslovnih subjekata, ovim zakonom i zakonima o sportu Republike Srpske, kantona i Brčko Distrikta Bosne i Hercegovine, kao i statutima sportskih saveza.**

#### **Član 28c.**

##### **(Sportsko društvo invalidnih lica)**

- (1) Sportski klubovi invalidnih lica mogu se udruživati u sportska društva invalidnih lica radi uređivanja i ostvarivanja zajedničkih ciljeva i interesa, kao i zajedničkog nastupanja u oblasti sporta.**

(2) Sportski klubovi invalidnih lica udruženi u sportsko društvo invalidnih lica reguliraju međusobne odnose i prava osnivačkim aktom i drugim aktima sportskog društva invalidnih lica.

(3) Sportsko društvo invalidnih lica je nosilac prava na zajednički naziv i zajedničke simbole, ako osnivačkim i drugim aktima nije drugačije određeno.

(4) Na osnivanje, upis u registar, obavljanje sportskih aktivnosti i sportskih djelatnosti, rješavanje sporova, odgovornost, kao i na druga pitanja u vezi s radom sportskih društava invalidnih lica dosljedno se primjenjuju odredbe ovog zakona koje se odnose na sportska udruženja, ako ovim zakonom nije drugačije određeno.

#### **Član 28d.**

##### **(Sportski savez invalidnih lica)**

(1) Sportski savez invalidnih lica organizira se na nivou Bosne i Hercegovine i entiteta, kantona i Brčko Distrikta Bosne i Hercegovine a u zavisnosti od razvijenosti sporta za invalidna lica. Za jedan sport na nivou Bosne i Hercegovine može se osnovati samo jedan sportski savez invalidnih lica.

(2) Sportski savez invalidnih lica Bosne i Hercegovine osniva se u skladu s ovim zakonom i Zakonom o udruženjima i fondacijama Bosne i Hercegovine, na osnovu odluka Republike Srpske, kantona i Brčko Distrikta Bosne i Hercegovine, sportskih saveza za invalidna lica o dobrovoljnom udruživanju, a u slučaju spora između sportskih saveza, odluku o tome donosi Vijeće ministara BiH.

(3) Sjedište sportskih saveza pojedinog sporta za invalidna lica Bosne i Hercegovine određuje se na osnovu razvijenosti sporta, tradicije, masovnosti i kvaliteta određene sportske grane.

(4) Ukoliko zbog nerazvijenosti sporta ne postoji organiziran sportski savez za invalidna lica na nivou jednog entiteta, kantona i Brčko Distrikta Bosne i Hercegovine, registriranje saveza na nivou Bosne i Hercegovine za taj sport izvršit će se uz saglasnost Ministarstva civilnih poslova BiH, a do ispunjenja uslova iz stava (2) ovog člana.

#### **Član 28e.**

##### **(Nadležnost sportskih saveza invalidnih lica)**

Sportski savezi invalidnih lica Bosne i Hercegovine nadležni su za:

- a) organiziranje i provođenje sistema takmičenja,
- b) zastupanje i predstavljanje sporta za invalidna lica u međunarodnim sportskim organizacijama,
- c) pripremanje i nastupanje državnih reprezentacija na zvaničnim međunarodnim takmičenjima,
- d) utvrđivanje programa razvoja u skladu sa Strategijom,
- e) saradnju s nadležnim sportskim i drugim organima Bosne i Hercegovine.

#### **Član 29.**

##### **(Paraolimpijski komitet Bosne i Hercegovine)**

(1) Sportski savezi invalidnih lica iz člana 28d. ovog Zakona udružuju se u Paraolimpijski komitet Bosne i Hercegovine.

(2) Paraolimpijski komitet Bosne i Hercegovine određuje način upotrebe i zaštite simbola i obilježja Međunarodnog paraolimpijskog komiteta (IPC) i druga pitanja iz djelokruga sportske aktivnosti invalidnih lica.

(3) Paraolimpijski komitet Bosne i Hercegovine predstavlja sport invalidnih lica u Međunarodnom i Evropskom paraolimpijskom komitetu. ~~—i odgovarajućim sportskim organizacijama i udruženjima.~~

(4) Djelokrug, članstvo, sastav, organi i tijela Paraolimpijskog komiteta Bosne i Hercegovine utvrđuju se osnivačkim aktom, statutom i drugim aktima Paraolimpijskog komiteta Bosne i Hercegovine.

#### Član 30.

##### **(Udruženja sportske rekreacije)**

(1) Da bi se zadovoljile potrebe građana da održe i poboljšaju zdravlje i psihofizičke sposobnosti i organizovalo vježbanje i bavljenje sportskim aktivnostima u slobodnom vremenu, osnivaju se udruženja sportske rekreacije.

(2) Udruženja-klubovi sportske rekreacije udružuju se u Savez sportske rekreacije Bosne i Hercegovine, u skladu sa članom 22. ovog Zakona.

### POGLAVLJE II- PRAVA I OBAVEZE PRAVNIH LICA

#### Član 31.

##### **(Sloboda i samostalnost)**

Pravna lica-sportska udruženja osnivaju se i organizuju slobodno i samostalna su u ostvarivanju svojih prava i obaveza, u skladu sa ovim Zakonom, entitetskim zakonima o sportu, Zakonom o udruženjima i fondacijama Bosne i Hercegovine, entitetskim zakonima o udruženjima i fondacijama.

#### Član 32.

##### **(Sticanje svojstva pravnog lica)**

Sportska udruženja stiču svojstvo pravnog lica upisom u registar koji vodi nadležni organ u skladu sa Zakonom o udruženjima i fondacijama Bosne i Hercegovine na nivou Bosne i Hercegovine, odnosno entiteta i drugih nivoa administrativnog organiziranja u Bosni i Hercegovini, u sjedištu organizacija.

#### Član 33.

##### **(Skupština udruženja)**

Pravna lica koja su u smislu ovog Zakona registrirana kao udruženje u oblasti sporta, osim osnivačkog akta i statuta, moraju imati skupštinu kao najviši organ udruženja.

#### Član 34.

##### **(Obavljanje privredne djelatnosti)**

Pravna lica mogu obavljati privredne djelatnosti samo ako je osnovna svrha takvih djelatnosti ostvarivanje ciljeva utvrđenih statutom.

#### Član 35.

##### **(Radni odnos u sportskim organizacijama)**

- (1) Pravna lica mogu zasnovati radni odnos sa sportistima, stručnim radnicima, stručnim i administrativnim osobljem.
- (2) Radni odnos u sportskim organizacijama, kao pravnim licima registriranim na nivou Bosne i Hercegovine, uređuje se ugovorom o radu u skladu sa Zakonom o radu u institucijama Bosne i Hercegovine ("Službeni glasnik BiH", broj 26/04, 7/05, 48/05, 60/10 i 32/13).
- (3) Zaposleni ima sva prava i obaveze iz radnog odnosa koji su utvrđeni Zakonom iz stava (2) ovog člana, kolektivnim ugovorom i ovim Zakonom.
- (4) Radni odnos kod sportskih udruženja kao pravnih lica na entitetskom i drugim nivoima administrativnog organiziranja uređuje se ugovorom o radu, u skladu sa odgovarajućim propisima na tom nivou.

### POGLAVLJE III- FIZIČKA LICA U OBLASTI SPORTA

#### Član 36.

##### **(Fizička lica)**

Fizička lica u oblasti sporta su: sportisti, stručni i sportski radnici.

#### Član 37.

##### **(Sportista)**

- (1) Sportista u smislu ovog Zakona je lice koje se priprema i učestvuje u organiziranim sportskim takmičenjima.
- (2) Sportista ima sva građanska prava utvrđena Ustavom i zakonima Bosne i Hercegovine, entitetskim ustavima i zakonima, zakonima i drugim propisima na drugim nivoima administrativnog organiziranja, kao i odredbama ovog Zakona i entitetskim zakonima o sportu.

#### Član 38.

##### **(Vrste sportista)**

- (1) Sportista može da se bavi sportskim aktivnostima samostalno i u okviru sportskih udruženja.
- (2) Sportista može da se bavi sportskim aktivnostima amaterski ili profesionalno.

### DIO TREĆI- PRAVA I OBAVEZE SPORTISTA, STRUČNI RAD, ZDRAVSTVENA ZAŠTITA I ANTIDOPING

### POGLAVLJE I- PRAVA I OBAVEZE SPORTISTA



#### Član 39.

##### **(Prava sportista)**

(1) Sportista je obavezan da se pridržava općih i posebnih pravila koji su propisani ovim Zakonom, entitetskim zakonima o sportu, pravilima svojih organizacija i pravilima međunarodnih sportskih asocijacija.

(2) Osim prava iz člana 37. ovog Zakona, sportista ima pravo da:

a) bude zaštićen od svake vrste duhovnog i fizičkog nasilja, ugrožavanja slobode ljudskog i sportskog integriteta, zdravlja i sportskog dostojanstva,

b) koristi sportske objekte i opremu, usluge stručnog rada i zdravstvene zaštite u skladu sa propisima koji to reguliraju,

c) na osnovu slobodno izražene volje učestvuje u reprezentativnim selekcijama.

(3) Sportista kome drugi takmičar pri takmičenju nanese tjelesnu povredu ima pravo na naknadu štete, ako mu je povreda nanesena namjernim ili grubim kršenjem sportskih pravila.

#### Član 40.

##### **(Obaveze sportista)**

Sportista je obavezan da:

a) poštuje norme i pravila sportskog ponašanja,

b) redovno trenira i učestvuje na takmičenjima,

c) poštuje sportska pravila, službena lica i gledaoce,

d) svojim ponašanjem čuva ugled sportskog kolektiva i sredine koju predstavlja,

e) sarađuje sa zdravstvenim službama i posebnim organima koji provjeravaju upotrebu nedozvoljenih stimulativnih sredstava.

#### Član 41.

##### **(Status vrhunskog sportiste)**

(1) Sportista stiče status vrhunskog sportiste Bosne i Hercegovine ako shodno međunarodnim standardima ostvaruje vrhunske sportske rezultate.

(2) Bliži kriterijum za sticanje statusa vrhunskog sportiste utvrđuje se pravilnikom o kategorizaciji sportista koji donosi Vijeće ministara BiH na prijedlog ministra civilnih poslova BiH.

#### Član 42.

##### **(Sportista strani državljanin)**

(1) U sportskim takmičenjima u Bosni i Hercegovini mogu učestvovati i strani državljani.

(2) Prava i obaveze sportista stranih državljana reguliraju se ugovorom sa sportskim udruženjima u skladu sa međunarodnim sportskim pravilima.

(3) Sportista i sportski stručnjaci strani državljani moraju imati dozvolu za rad od nadležnog državnog organa i registrirati se u entitetskom ministarstvu nadležnom za sport i nadležnom organu Brčko Distrikta Bosne i Hercegovine.



Član 43.

**(Sportski sindikat)**

Sportisti i sportski stručnjaci mogu osnovati sportski sindikat u skladu sa zakonom i pravilima Saveza sindikata BiH, saveza sindikata entiteta i Brčko Distrikta Bosne i Hercegovine.

POGLAVLJE II- STRUČNI RAD U OBLASTI SPORTA

Član 44.

**(Osposobljenost za stručni rad)**

(1) Stručne poslove u oblasti sporta mogu obavljati isključivo stručna lica osposobljena za rad u sportu.

(2) Stručna lica moraju ispunjavati sljedeće uvjete:

- a) imati visoku ili višu stručnu školsku spremu iz oblasti sporta i fizičkog vaspitanja, ili
- b) imati visoku ili višu školsku spremu iz drugih oblasti i licencu za rad u oblasti sporta, ili
- c) imati status vrhunskog sportiste sa diplomom za rad u oblasti sporta.

(3) Školovanje kadrova za rad u sportu i fizičkom vaspitanju, te izdavanje diploma za rad u sportu obavljaju visokoškolske ustanove.

(4) Stručno usavršavanje i osposobljavanje u sportu obavljaju visokoškolske ustanove i ustanove registrirane za poslove stručnog usavršavanja i osposobljavanja.

Član 45.

**(Vrste stručnih poslova)**

Stručni poslovi u sportu u smislu ovog Zakona su:

- a) planiranje i realiziranje sportskih aktivnosti djece i omladine,
- b) planiranje i realiziranje sportske obuke,
- c) planiranje i treniranje sportista,
- d) obučavanje građana u sportskim znanjima i vještinama,
- e) planiranje i realiziranje sportske rekreacije građana,
- f) dijagnosticiranje i provjera psihofizičkih i motoričkih sposobnosti učesnika,
- g) planiranje i izvođenje korektivne gimnastike,
- h) sprovođenje pravila u sportu,
- i) informatika u sportu,
- j) menadžment i marketing u sportu,
- k) naučnoistraživačke djelatnosti.

Član 46.

**(Stručna lica sa licencom)**

Sudije, delegati i sportski radnici su stručna lica koja imaju licence sportskog saveza da mogu da obavljaju određene aktivnosti u sportu.

POGLAVLJE III- ZDRAVSTVENA ZAŠTITA U SPORTU I ANTIDOPING KONTROLA

Član 47.

**(Obavezna zdravstvena zaštita)**

- (1) Zdravstvena zaštita je obavezna za sve učesnike u sportu.
- (2) U sportskim takmičenjima može učestvovati samo lice za koje je u periodu od šest mjeseci prije sportskog takmičenja utvrđena opća i posebna zdravstvena sposobnost, koju utvrđuje ovlašćeni ljekar specijalista sportske medicine.

Član 48.

**(Uvjeti za obavljanje zdravstvenih pregleda)**

Uvjete za obavljanje zdravstvenih pregleda sportista, te način vođenja evidencije i medicinske dokumentacije sportista propisuje entitetski ministar zdravlja, uz mišljenje entitetskog ministarstva nadležnog za sport, u skladu sa propisima međunarodnih sportskih federacija.

Član 49.

**(Zabrana dopinga)**

Sportistima i svim učesnicima u sportu zabranjeno je da uzimaju nedozvoljena stimulativna sredstva, da ih daju kao i da podstiču njihovo korišćenje u skladu sa pravilima Svjetske antidoping agencije (WFADA).

**DIO ČETVRTI- SPORTSKA TAKMIČENJA I PRIREDBE, SPORTSKI OBJEKTI I SUZBIJANJE NEDOLIČNOG PONAŠANJA NA SPORTSKIM PRIREDBAMA**

Član 50.

**(Cilj sportskih takmičenja)**

Sportska takmičenja i priredbe (manifestacije, susreti, smotre, igre) organiziraju se s ciljem afirmiranja i popularizacije sporta i ostvarivanja vrhunskih sportskih rezultata.

Član 51.

**(Sistem, uvjeti i organizacija takmičenja)**

- (1) Sportski savezi Bosne i Hercegovine utvrđuju sistem, uvjete i organizaciju sportskih takmičenja u Bosni i Hercegovini, u skladu sa odredbama ovog Zakona i pravilima međunarodnih sportskih asocijacija.
- (2) Organizator je dužan da osigura nesmetano i sigurno održavanje sportskih priredbi i sportskih takmičenja. Organizator je dužan da preduzme mjere koje omogućavaju predupređenje rizika nastanka štete za učesnike, gledaoce i treća lica (upozorenja, isticanja zabrana, davanja obavještenja i uputstava i sl.).
- (3) Organizator sportskih priredbi i sportskih takmičenja je dužan da, imajući u vidu njen značaj, očekivani broj gledalaca i druge okolnosti, utvrdi da li postoji izražen rizik da za vrijeme njihovog održavanja dođe do nasilja ili nedoličnog ponašanja gledalaca.
- (4) Ukoliko postoji opasnost iz stava (3) ovog člana, organizator sportskih priredbi i sportskih takmičenja dužan je da preduzme potrebne sigurnosne mjere u skladu sa zakonom.
- (5) Sportske organizacije, sportisti i drugi učesnici sportskog takmičenja dužni su da sarađuju sa organizatorom i ne smiju svojim postupcima izazivati ili doprinosti nasilju ili nedoličnom ponašanju gledalaca.

(6) Sportske organizacije su obavezne da podstiču organizovanje i dobro ponašanje klubova navijača.

Član 52.

**(Usklađenost sa Evropskom konvencijom)**

Organiziranje sportskih takmičenja i priredbi mora da bude usklađeno sa preporukama Evropske konvencije o suzbijanju nasilja i nedoličnog ponašanja gledalaca na sportskim priredbama, posebno na fudbalskim utakmicama, i odgovarajućim zakonima i drugim propisima u Bosni i Hercegovini.

Član 53.

**(Međunarodna sportska takmičenja)**

U Bosni i Hercegovini mogu se organizirati međunarodna sportska takmičenja i priredbe:

- a) olimpijske i paraolimpijske igre,
- b) svjetska i evropska prvenstva,
- c) univerzijade,
- d) mediteranske igre,
- e) svjetski kupovi i završni turniri evropske i svjetske lige,
- f) zimski i ljetni olimpijski festival mladih Evrope,
- g) balkanska i druga regionalna prvenstva,
- h) kriterijumski i kvalifikacioni međunarodni sportski turniri,
- i) tradicionalne međunarodne sportske manifestacije koje su u kalendaru međunarodnih sportskih asocijacija.

Član 54.

**(Saglasnost za međunarodna takmičenja)**

Međunarodna sportska takmičenja i sportske priredbe mogu se organizirati u Bosni i Hercegovini ako organizator dobije saglasnost Ministarstva civilnih poslova BiH i nadležnog entitetskog organa, te osiguraju uvjete koji su predviđeni pravilima međunarodnih sportskih organizacija.

Član 55.

**(Sportski objekat)**

- (1) Sportski objekat je, u smislu ovog Zakona, višenamjenski otvoren ili zatvoren prostor namijenjen obavljanju sportskih aktivnosti.
- (2) Sportski objekat, osim prostora koji je namijenjen obavljanju sportskih aktivnosti, mora da ima neophodne prateće sadržaje i opremu te da bude pristupačan invalidnim licima.
- (3) Sportski objekti moraju ispunjavati propise međunarodnih sportskih asocijacija kao i standarde propisane odgovarajućim zakonima i drugim propisima.

Član 56.

**(Kategorizacija sportskih objekata)**

Na nivou Bosne i Hercegovine i entiteta, u skladu sa međunarodnim standardima, vodi se evidencija o kategorizaciji sportskih objekata, u skladu sa posebnim pravilnikom o

kategorizaciji sportskih objekata koji će donijeti ministar civilnih poslova BiH, na predlog entitetskih ministarstava nadležnih za sport.

#### Član 57.

##### **(Sportski objekti od interesa za Bosnu i Hercegovinu)**

- (1) Finansiranje izgradnje, održavanje, evidencija i korišćenje sportskih objekata od interesa za Bosnu i Hercegovinu regulira se posebnim sporazumom između institucija Bosne i Hercegovine, entiteta, Brčko Distrikta Bosne i Hercegovine i vlasnika objekta.
- (2) Posebnim pravilnikom koji donosi ministar civilnih poslova BiH, nakon usaglašavanja sa entitetskim ministarstvima nadležnim za sport, propisaće se uvjeti za utvrđivanje sportskih objekata od interesa za Bosnu i Hercegovinu.

#### Član 58.

##### **(Suzbijanje nasilja i nedoličnog ponašanja gledalaca na sportskim priredbama)**

- (1) S ciljem sprečavanja i suzbijanja nasilja i nedoličnog ponašanja gledalaca na sportskim priredbama, Bosna i Hercegovina i entiteti dužni su da preduzmu potrebne mjere u skladu sa Evropskom konvencijom o nasilju i nedoličnom ponašanju gledalaca na sportskim priredbama, posebno na fudbalskim utakmicama.
- (2) Posebnim zakonom utvrdit će se način i mjere za sprečavanje i suzbijanje nasilja i nedoličnog ponašanja gledalaca na sportskim priredbama.

#### DIO PETI- NADLEŽNI ORGANI ZA SPORT NA NIVOU BOSNE I HERCEGOVINE

#### Član 59.

##### **(Ministarstvo civilnih poslova BiH)**

Nadležni organ za poslove sporta na nivou Bosne i Hercegovine je Ministarstvo civilnih poslova BiH, u okviru kojeg se formira poseban sektor za sport.

#### Član 60.

##### **(Nadležnosti sektora za sport)**

Nadležnosti sektora za sport iz člana 59. ovog Zakona su:

- a) organiziranje i rukovođenje poslovima izrade Strategije,
- b) pripremanje predloga dugoročnih i godišnjih programa razvoja sporta u Bosni i Hercegovini,
- c) predlaganje budžeta sektora za sport,
- d) pripremanje predloga pravilnika o kategorizaciji sportista i sportskih objekata,
- e) pripremanje pravilnika o vođenju registra pravnih i fizičkih lica u oblasti sporta na nivou Bosne i Hercegovine,
- f) utvrđivanje sadržaja i oblika informacionih sistema o sportu u Bosni i Hercegovini,
- g) ostvarivanje saradnje sa sportskim savezima i drugim organizacijama i institucijama,
- h) definiranje Strategije na međunarodnom planu u oblasti sporta,
- i) obavljanje administrativnih, stručnih i drugih poslova u oblasti sporta u skladu sa ovim Zakonom.



Član 61.

**(Agencija za antidoping kontrolu)**

- (1) Ovim Zakonom osniva se Agencija za antidoping kontrolu.
- (2) Agencija za antidoping kontrolu osniva se kao samostalna upravna organizacija za praćenje i sprovođenje međunarodnih konvencija protiv dopinga u sportu u Bosni i Hercegovini.
- (3) Radom Agencije za antidoping kontrolu rukovodi direktor.
- (4) Direktora Agencije za antidoping kontrolu imenuje Vijeće ministara BiH na prijedlog predsjedavajućeg Vijeća ministara BiH.
- (5) Direktor Agencije za antidoping kontrolu ima dva pomoćnika direktora.

Član 62.

**(Nadležnosti Agencije)**

Agencija za antidoping kontrolu obavlja sljedeće poslove:

- a) sistematski prati i koordinira aktivnosti protiv dopinga u sportu,
- b) predlaže i sprovodi mjere protiv dopinga u sportu,
- c) odgovorna je za primjenu konvencija, kodeksa WADA i pravila Međunarodnog olimpijskog komiteta, Međunarodnog paraolimpijskog komiteta i međunarodnih sportskih saveza,
- d) rukovodi pripremama i procedurama za donošenje zakona kojim se uređuje ova oblast.

Član 63.

**(Unutrašnja organizacija Agencije)**

- (1) Unutrašnja organizacija Agencije za antidoping kontrolu utvrđuje se pravilnikom o unutrašnjoj organizaciji i radu.
- (2) Pravilnik o unutrašnjoj organizaciji i radu Agencije za antidoping kontrolu donosi direktor uz saglasnost Vijeća ministara BiH.

Član 64.

**(Informatika u sportu)**

- (1) S ciljem sistematskog praćenja i evidentiranja stanja u sportu, stručnoj, naučnoj i izdavačkoj djelatnosti, organizira se jedinstven informacioni sistem u sportu.
- (2) Sadržaj i oblik informacionog sistema utvrđuje sektor za sport Ministarstva civilnih poslova BiH, u skladu sa standardima evropske sportske informacione mreže.
- (3) Informacioni sistemi entiteta i drugih nivoa administrativnog organiziranja zajedno sa informacionim sistemom Bosne i Hercegovine čine jedinstven sistem.
- (4) Sva pravna i fizička lica registrirana za obavljanje sportskih aktivnosti obavezna su da vode evidenciju u skladu sa jedinstvenim informacionim sistemom u sportu.

**DIO ŠESTI- FINANSIRANJE SPORTA**

Član 65.

**(Sredstva za finansiranje)**

Sredstva za finansiranje sportskih aktivnosti ostvaruju se:



- a) od članarine,
- b) iz budžetskih sredstava institucija Bosne i Hercegovine, entiteta i drugih nivoa administrativnog organiziranja,
- c) od donacija i sponzorstva pravnih i fizičkih lica,
- d) iz prihoda od kamata i zakupnina,
- e) od igara na sreću,
- f) iz prihoda stečenih aktivnostima utvrđenim statutom sportske organizacije,
- g) iz drugih prihoda.

#### Član 66.

##### **(Finansiranje javnog interesa Bosne i Hercegovine)**

(1) Javni interes u sportu u Bosni i Hercegovini ostvaruje se sufinansiranjem iz sredstava budžeta institucija Bosne i Hercegovine na osnovu Strategije, dugoročnih i godišnjih programa razvoja sporta u Bosni i Hercegovini.

(2) Javne potrebe u sportu na državnom nivou su:

- a) podsticanje i afirmiranje sporta, posebno sporta djece, mladih, studenata i osoba sa invaliditetom,
- b) podsticanje planiranja i izgradnje sportskih objekata,
- c) briga o vrhunskim sportistima,
- d) djelovanje sportskih saveza i Olimpijskog komiteta BiH,
- e) djelovanje informatičkog sistema u sportu,
- f) naučni i razvojni programi u sportu,
- g) međunarodna sportska saradnja i međunarodne obaveze BiH,
- h) dodjeljivanje državne nagrade za sport.

#### Član 67.

##### **(Olakšice za sportske organizacije)**

Zakonom se utvrđuju posebne olakšice za sportiste i sportske organizacije, a naročito prilikom izgradnje i održavanja sportskih objekata, organizacije velikih sportskih takmičenja, sportskih priredbi, nabavke sportske opreme i u pogledu sistematskih pregleda sportista.

#### Član 68.

##### **(Olakšice za ulagače sredstava za razvoj sporta)**

Zakonima Bosne i Hercegovine iz oblasti poreske politike, pravnim i fizičkim licima koja ulažu sredstva u razvoj sporta, uložena sredstva priznaju se kao troškovi i oslobođeni su poreza.

#### DIO ŠESTI A – DRŽAVNA NAGRAĐA ZA SPORT

#### Član 69.

##### **(Državna nagrada za sport)**

(1) Državna nagrada za sport (u daljnjem tekstu: Državna nagrada) najviše je priznanje koje Bosna i Hercegovina dodjeljuje za posebne rezultate i doprinos od posebnog značaja za razvoj sporta u Bosni i Hercegovini.

(2) Državna nagrada dodjeljuje se stručnim i javnim radnicima u oblasti sporta, sportistima, pravnim i fizičkim licima koja obavljaju sportsku djelatnost te drugim pravnim i fizičkim licima zaslužnim za razvoj sporta.

(3) Državna nagrada dodjeljuje se u obliku medalje, posebne diplome i novčane nagrade.

#### Član 69a.

##### **(Komisija za državnu nagradu za sport)**

(1) Državna nagrada dodjeljuje se za višegodišnje uspješno djelovanje u sportu, osvajanje olimpijske medalje, te posebno naučno, stručno, pedagoško ostvarenje ili sportsko dostignuće.

(2) Odluku o državnoj nagradi donosi Komisija za državnu nagradu za sport (u daljnjem tekstu: Komisija za državnu nagradu).

(3) Komisija za državnu nagradu ima predsjednika i pet članova, koje bira Parlamentarna skupština BiH iz reda uglednih sportskih i javnih radnika, istaknutnih sportista i drugih istaknutnih stručnjaka iz oblasti sporta na period od četiri godine, na prijedlog Vijeća ministara BiH.

(4) Državna nagrada dodjeljuje se kao godišnja nagrada i nagrada za životno djelo.

(5) Nagrade iz stava (4) ovog člana, licima iz člana 69. stav (2), mogu se dodijeliti samo jednom.

(6) Vijeće ministara BiH donosi pravilnik kojim bliže uređuje kriterije za dodjelu državne nagrade, način rada Komisije za državnu nagradu i druga pitanja značajna za dodjelu državne nagrade.

#### Član 69b.

##### **(Osiguranje sredstava)**

(1) Dodjela državne nagrade od državnog je interesa, a sredstva za dodjelu nagrade osiguravaju se u Budžetu institucija Bosne i Hercegovine.

(2) Visinu novčanog dijela godišnje nagrade i nagrade za životno djelo odlukom će odrediti Vijeće ministara BiH.

#### **DIO SEDMI- NADZOR NAD SPROVOĐENJEM ZAKONA**

#### Član 70.

##### **(Nadzor nad sprovođenjem Zakona)**

(1) Nadzor nad sprovođenjem ovog Zakona i propisa koji su doneseni na osnovu ovog Zakona na nivou Bosne i Hercegovine vrši Ministarstvo civilnih poslova BiH.

(2) Pitanje upravnog i stručnog nadzora na entitetskom i drugim nivoima administrativnog organiziranja vršiće entitetska ministarstva zadužena za sport, a na osnovu posebnih zakonskih i podzakonskih akata.

#### **DIO OSMI- KAZNE NE ODREDBE**

Član 71.

**(Kaznene odredbe)**

(1) Novčanom kaznom u iznosu od 5.000,00 KM do 10.000,00 KM kaznit će se za prekršaj pravno lice ako:

- a) obavlja sportsku djelatnost a nije registrirano u skladu sa članom 14. ovog Zakona i upisano u poslovni registar iz člana 15. ovog Zakona,
- b) obavljanje stručnih poslova u sportu povjeri licima koja za to ne ispunjavaju uvjete iz čl. 44, 45. i 46. ovog Zakona,
- c) omogućiti da na sportskom takmičenju učestvuje lice za koje nije utvrđena opća ili posebna zdravstvena sposobnost,
- d) organizira sportsko takmičenje i sportsku priredbu u Bosni i Hercegovini a ne ispunjava uvjete iz člana 52. ovog Zakona,
- e) organizira međunarodno sportsko takmičenje ili sportsku priredbu bez saglasnosti organa iz člana 54. ovog Zakona,
- f) ne zasnuje radni odnos sa sportistom, stručnim radnikom, stručnim i administrativnim zaposlenikom u skladu sa članom 35. ovog Zakona,
- g) organu uprave ne dostavi u propisanom roku tražene podatke ili akte u vezi sa postupanjem u upravnom postupku i vršenju upravnog nadzora,
- h) ako organizira sportsko takmičenje i sportsku priredbu u BiH, a ne ispunjava uslove iz člana 51. ovog Zakona.

(2) Novčanom kaznom u iznosu od 1.000,00 KM do 5.000,00 KM kaznit će se za prekršaj fizičko lice ako:

- a) se ne pridržava odredaba iz člana 40. ovog Zakona,
- b) se bavi stručnim radom u oblasti sporta a ne ispunjava uvjete iz čl. 44, 45. i 46. ovog Zakona,
- c) ne posjeduje dozvolu za rad iz člana 42. ovog Zakona.

(3) U slučaju ponovnog prekršaja, prekršilac će se kazniti maksimalnom novčanom kaznom iz st. (1) i (2) ovog člana.

**DIO DEVETI- PRELAZNE I ZAVRŠNE ODREDBE**

Član 72.

**(Zavod za fizičku kulturu Bosne i Hercegovine)**

(1) Danom stupanja na snagu ovog Zakona prestaje da važi Zakon o fizičkoj kulturi Bosne i Hercegovine ("Službeni list SRBiH", broj 24/91) te time i Zavod za fizičku kulturu BiH, a imovina Zavoda prelazi u svojinu Bosne i Hercegovine.

(2) Posebna komisija Ministarstva civilnih poslova BiH utvrdit će stanje obaveza i završni račun Zavoda, popis imovine i obaveze prema zaposlenima.

Član 73.

**(Kontinuitet sportskih organizacija)**

Olimpijski komitet Bosne i Hercegovine i sportski savezi na nivou Bosne i Hercegovine koji su djelovali do donošenja ovog Zakona nastavljaju svoj rad i djelovanje, s tim što su dužni da

u roku od šest mjeseci od dana stupanja na snagu ovog Zakona reorganiziraju i usklade svoje normativne akte sa odredbama ovog Zakona.

Član 74.

**(Obaveza donošenja podzakonskih akata)**

Podzakonski akti za sprovođenje ovog Zakona bit će doneseni u roku od godinu dana od dana stupanja na snagu ovog Zakona.

Član 75.

**(Obaveza donošenja usklađenih zakona)**

Nadležni organi entiteta i drugih nivoa administrativnog organiziranja u Bosni i Hercegovini dužni su da u roku od godinu dana od stupanja na snagu ovog Zakona donesu, odnosno usklade sa ovim Zakonom svoje zakone i propise koji se odnose na oblast sporta.

Član 76.

**(Formiranje nadležnih organa za sport Bosne i Hercegovine)**

Vijeće ministara BiH formirat će u roku od 60 dana od dana stupanja na snagu ovog Zakona poseban sektor za sport u Ministarstvu civilnih poslova BiH i Agenciju za antidoping kontrolu i pokrenuće aktivnosti za imenovanje rukovodilaca.

Član 77.

**(Stupanje na snagu)**

Ovaj Zakon stupa na snagu osmog dana od dana objavljivanja u "Službenom glasniku BiH".

\*\*\*

**"Službeni glasnik BiH" broj 102/09**

Član 7.

Ovaj Zakon stupa na snagu osmog dana od dana objavljivanja u "Službenom glasniku BiH".

\*\*\*